

U CIAURU RU PANI

STAMATINA MENTRI CA ERA ANCORA N'SUNNACCHIATU,
SINTII CUOMU 'NCIAURU CHI TRASIA RA FINESTRA,
MI PARSI CHIDDU RU PANI RI NA VOTA.
MI VINNI MMENTI ME MATRI CU CRIVU NNE MANU,
CU FALARI E U FAZZULETTU N'TESTA,
CHI PI 'MPASTARI U PANI, SI PRIPARAVA.. .LESTA LESTA.

CIRNIA NNA MAIDDA A FARINA,
ITTANNICI U CRESCENTI A PIZZULUNA,
A 'NCICIRAVA, A PUGNIAVA E APUI 'MPANAVA;
NN0 LIETTU A LIEGGIU A LIEGGIU U SISTIMAVA.

"RUNA ACCURA!" MI RICIA A-MMIA.
"NUN IAPRIRI A PORTA CA SI 'NTRONA!"
IU MI MITTIA NTA NA GNUNIDDU MUTU, MUTU,
ASPITTANNU CA MI FACIA NA VASTEDDA O I CUDDURUNA.

U FUOCU CU RRASTIEDDU FURRIAVA,
CA PALA 'NFURNAVA I FURMI A UNA A UNA,
CHIURÀ U FURNU CA VUCCHINA,
E ASPITTAVA CA SUPRA U PANI CI CALAVA A-RROSA.
QUANNU ERA CUOTTU U SFURNAVA
E PI NUN S'ABBRUÇIARI NNE MANU U FURRIAVA... ..
PRIMA RI PUSALLU U VASAVA.

ME PATRI A MATINA SI NNI IA PI TRAVAGGHJARI,
NUN'MPANUZZU SI MITTIANNA SACCHINA,
A SIRA, PURU CA ERA N TUOZZU, NNA SACCHETTA
U TURNAVA, SI PPICCA ERA,
ANCORA CCHIU' PPICCA CCIABBASTAVA.

ME MATRI ADDIVINTAU VECCHIA,
STA ASSITTATA NA NUN FULLIZZU,
CI CIUNCARU JAMMI E VIRAZZA,

ORA CA SUGNU SMARINATU, MI VUOTU E SBUOTU
PI VIRIRI RI UNNI DDU ÇIAURU VINIA,
RUOPPU ARRIESTU SCUNFURTATU...
PIRCHI' NO, NUN ERA ÇIAURU RI PANI CHIDDU CHI SINTIA, ..
ERA ÇIAURU RI MALINCUNIA.

Gaetano Spinnato